

խոնարհուում ոչ մի իշխանութեան, եւ իր ազատութիւնը գտնում է իր սրի եւ իր կոպիտ բռնակալական ուժի մէջ: Իսկ Նոյն բռնութեան անբախտ զոհը է մի ազգ, որ վաղուց կորցրել է իր սուրը, որի մէջ վաղուց սպանուել է ազատութեան եւ ինքնապաշտպանութեան ոգին, որ իր գլուխը ամենայն հնազանդութեամբ խոնարհեցնում է ամեն մի անիրաւ ձեռքի ներքոյ...

Ժ2. ՍԻՐԱՅԱՐԻ ԳԵՐԵԶՄԱՆԸ

Միւս օրը ես զարթեցայ խիստ ուշ: Ծանապարհի յոգնածութիւնը, որ առաջին անգամն էր իմ կեանքում, բաշխել էր ինձ հանգիստ եւ երկարատեւ քուն: Ընկերներիցս ոչ մէկը չկար այնտեղ, ես մենակ էի մնացել քնարանում: Իսկոյն հազնտեցայ եւ դուրս եկայ, որ տեսնեմ ո՞ր եւն գնացել նրանք:

Գեղեցի՛կ էր լեռնային առաւօտը. ճնճողւկները տակաւին չըկչըկում էին վարսագեղ ուռիների վրայ, որոնցմով հովանաւորուած էր որսորդի տնակը, եւ արեւի առաջին ճառագայթներով լուսաւորուած բակում հաւերն ախորժանոք քաղում էին գետնից յունդերի հատիկները, որ ցրում էր Մարօն:

Դուրս գալով իմ սենեկից, ես առաջին անգամ նկատեցի, որ Աւօյի տնակը թէ իր շինածքով եւ թէ մաքրութեամբ համարեա մի պալատ էր, գիւղի միւս խրճիթների հետ համեմատելով: Նա կանգնած էր գետնի մակերեսոյթից բաւականին բարձր. պարունակում էր իր մէջ մի քանի փոքրիկ սենեակներ, նեղ պատուհաններով, ուր ապակու փոխարէն լուսամուտները պատած էին թղթով: Պատերը թէ ներսից եւ թէ դրսից ծեփած էին սպիտակ կաւով, որոնք շատ կոկելուց մի առանձին փայլ էին ստացել: Խրճիթի մէկ մասը բաժանած էր անասունների համար, այնտեղ զետեղուած էին՝ ախոռը, մարագը եւ ոչխարների գոմը:

Մարօն ինձ տեսնելով, մօտ վազեց եւ հեզնական ժպիտը երեսին, ասաց.

– Տե՛ս, նրանք գնացին, քեզ այստեղ թողեցին, ի՛նչ տղայ ես, այսքան էլ կը քնե՛ն. կ'ասես թէ, շատ ճանապարհ է եկել, – մի օր եւ կես, այն էլ ձիով, – դրա համար յոգնել է... Ծո՛յլ: – Ես ոտով մինչեւ Բարդուղիմէոս գնացի, ինչքան հայրիկն ասաց, ձին չնստեցի, ուխտ էի արած: Երբ այնտեղ հասանք, չես հաւատայ Ֆարհատ, ողջ գիշերը չքնեցի, հէնց պար էի գալիս եւ թռչկոտում...: Ա՛խ, ի՛նչ լաւ էր այն գիշերը, ափսոս այնտեղ չէիր, Ֆարհատ: Ուխտաւորները հէնց ածում էին, ածում, «ջան գիւլում» ասում, ու խաղում էին մինչեւ լոյս...: